

Zeitschrift: Annalas da la Societad Retorumantscha
Herausgeber: Societad Retorumantscha
Band: 76 (1963)

Nachruf: † Alexander Pfister
Autor: Deplazes, Gion

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 06.08.2025

ETH-Bibliothek Zürich, E-Periodica, <https://www.e-periodica.ch>

† Alexander Pfister

Gion Deplazes

Sco strusch ad in auter organ romontsch descha ei allas Annalas dalla Societad Retoromontscha da seregurdar da prof. Alexander Pfister, morts ils 7 da fenadur 1961 a Basel, pertgei ins astga bein dir che A. Pfister hagi publicau tut sias ovras romontschas — dentier auter impurtontas lavurs sur la historia grischuna — en nies organ.

Sia veta plein risguards ei stada in cuntuau encurir — in stendiu survetsch alla verdad — per el sco per biars auters ni maneivla ni cumadeivla. Mo el fuv'adina perschuadius che la verdad — ina gada alla glisch — stoppi cul temps era vegin renconuschida.

Alexander Pfister ei naschius ils 30 da settember 1876 a Schlans sco fegl inspectur da scola J. M. Pfister. Sia giuventetgna ha el passentau a Schlans ed a Glion, nua che la famiglia fuva secessada. La malsogna dil bab ha denton stimulau la famiglia da returnar a Schlans, nua che Pfister ha finiu ses onns da scola primara. Da 1892 — 97 frequenta el la Scola cantunala a Cuera, il seminari scolastic. Ses professers preferi ein: siu padrin G. H. Muoth, G. A. Bühler e J. B. Cadotsch. Sia pratica entscheiva el sco scolast a Sur-saissa tudestga, cuntascha denton ladinamein ses studis a Berna ed acquista la patenta da scolast secundar per surprender la scola circuitala a Zir igl onn 1891. Suenter dus onns doctorescha el a Berna cun ina lavur curaschusa e da tempra profilada sur dils Patriots el Grischun duront il 18avel tschentaner.

Alla fin dil studi sa Pfister buca propri aunc tgei far. El vess magari giu talien per la schurnalistica. Da l'autra vart fuss el il pli bugen vegnius el Grischun, fuss suandaus leu ils fastitgs da siu padrin G. H. Muoth che pusina e veva gest survegniu l'incarica da scriver ina historia grischuna. Mo il destin decida autruisa. Pfister serenda all'universitad da Berlin e returnond da leu, vegn el

clamaus a Basel al gimnasi da mattauns, nua ch'el resta 33 onns sco professer da tudestg e historia.

Professer «Pi», sco el vegneva numnaus generalmein tenor l'abrevaziun egl urari, fuva in ver Grischun, in um dils cuolms, disaus da luvrar da giuven ensi e dad ir savens per trutga teissa e vias stretgas e carpusas. El spitgava e pretendeva era da sias scolaras buna e seriusa lavur. Sch'el fuv'en scola plitost retenius e retratgs, el fuva tonaton in carstgaun ordvart fin e sensibel che pesentava plaid e fatg ed untgeva da far entiert ad enzatgi. El veva sco scolar sentiu vid l'atgna pial, tgei ch'ei muntava da vegnir smaccaus siper las preits. Tgi che veva denton gudignau ina ga sia confidanza, quel gudeva ella ina veta ora. El fuv'in magister cun gronda capientsha, d'ina buontad nuninteressada e da sabi cussegli. Ed el selegrava aunc en aulta vegliadetgna, seregurdond da quella e tschella scolara che spluntava suenter dis ed onns tier el per cussegli.

Ina ga secasaus a Basel, ha Pfister spusau Dora de Jecklin, ina feglia grischuna. Ella ha accumpignau el 52 onns en ina lètg ventireivla, schegie buca benedida cun affons. Ils 10 da fenadur 1961 han ins surdau sias restonzas terrestras al santeri a Basel, nua ch'el ruaussa sper sia consorta sco giavischau sin pugn da mort.

Alexander Pfister ha buca giu la pusseivladad da star el Grischun. El ha stuiu encuir sco tons auters Grischuns e Romontschs studegiai e meins scolai il paun sut outras steilas. El ha denton adina schau encrescher per sia patria. Ed el ei seregurdaus dad ella era sin pugn da mort, fagend si sia facultad per gronda part a sia vischnaunca nativa sco ad otras corporaziuns dil generaless. E tochen ch'el viveva vargava ei buc ina stad, che Pfister vegneva buc el Grischun: a Breil, Churwalden a Planoiras ed a Schlans. Ei fuva cun quella caschun pli che mo interessant da spassegiar cun Alexander tras il marcau da Cuera, nua ch'el mussava ils logs historics ord il temps dallas partidas e dils cumbats malmaneivels. Ed ins fuva buca mal surstaus da sentir che Pfister fuva buca mio da casa ella historia ed ella litteratura veglia romontscha, mobein ch'el persequitava cun egl aviert e senn critic il svilup da nos dis.

Bunamein tut las lavurs da scrutaziun historica ein dedicadas al Grischun, oravontut alla historia dalla Surselva. E las lavurs romontschas ein publicadas ellas Annalas. Gia sia dissertaziun fuva buc ina lavur da mintgadi. Las pli interessantas lavurs relatan dils



Prof. Alexander Pfister

cumbats e dallas partidas ella Ligia Grischa da 1494—1794. Ins sa adina puspei cattar influenza e fastitg da siu padrin Muoth che veseva la historia dils Grischs en sia polaritat da signurs e puraglia. Pfister steva ils davos onns mal ch'el hagi buca suandau la laver da siu padrin e secret ina historia grischuna.

La Cruna dalla scrutaziun historica ei bein il Gieri Genatsch, cumparijus pil 300avel onn dalla mort en emprema ediziun 1938, en secunda 1939 ed en tiarza amplificada e midada considerabamein 1951. Tgi che sa, che A. Pfister veva luvrau 30 onns avon ch'edir siu emprem Genatsch, ch'el fuva in onn gia pensiunaus cu l'emprema ediziun ei cumparida e cumpareglia quella cun la tiarza dils anno 51, quel ha pér in'idea dil scrutader Pfister. Quei tonpli che E. Haffter veva gia publicau ils onns 1894/95 il resultat da sias scrutaziuns zun vastas e per lu fetg bein documentadas. Ed ei ha mai muncau vuschs che sehanavan in quex d'ina nova retscherca sur il Genatsch e che temevan che Pfister mettess si ina gloriola al Genatsch. Dr. R. Jenny, archivar cantunal scriva leusura il sequent: «Cun pazienza e perseveranza, cul fin sentiment dil scrutader talentau dad egl e spért scolau dad onns enneu tras premura ed attaschadad alla verdad ha Alexander Pfister tschercau pruamein da tschaffar la personalitat da Genatsch, slargiond sia scrutaziun ad in cumbat per verdad e giustia.» E prof. dr. O. Vasella giudichescha sco suonda: «Sias numerusas lavurs historicas ein carshidas ord la carezia per la historia da sia patria pli stretga, oravontut dalla Surselva. Ed el enconuscha da funs la historia dallas partidas dil 16avel e 17avel tschentaner sco era diil 19avel el Grischun . . . Mo il grond tema da sia scrutaziun meriteivla che ha cuzzau decennis ei la personalitat forsa che dat si ils pli bia legns e la pli dispeteivla dall'entira historia grischuna, il Gieri Genatsch.»

Il Gieri Genatsch ei daventaus per Pfister siu destin. Ed anflond Sur Gius. Pelican a Ruma egl archiv dils caputschins avon entgins onns las copias da tschun brevs da Genatsch, scretas a siu cunfrar, il predicator Stefan Gabriel ord igl onn 1636, ei A. Pfister aunc ina gada semess alla laver ed ha preparau per la stampa igl epistulari dil Genatsch.

Sper il valent scrutader dalla historia ston ins denton allegar elles Annalas Pfister, il Romontsch. Sia relaziun cul romontsch fuva gia dada da sia tgina. Siu bab, enconuschents sco cumpilader da cu-

dischs da scola entuorn ils 1900, siu padrin, il professer Muoth. Mo Pfister enconuscheva era fetg bein Alfons Tuor, G. M. Nay e. a. valents poets e scribents. Pfister ha ensemen cun G. B. Derungs procurau per l'emprema ediziun cumpletta dallas Ovras da G.H. Muoth ellas Annalas 22. Ellas Annalas ha Pfister sez publicau ca. in tozzel lavurs, igl emprem poesias sut il pseudonim Gion Perfist, silsuenter las lavurs historicas sut agen num, sco era ina poesia Miu vitget, in cant da laud e carezia per siu Schlans sin spunda sulegliava.

Per cumiau e partenza da quest mund ha el giavischau ils plaids da s. Gion 6,69: «Segner, tier tgi duessen nus ir? Ti has plaids dalla veta perpetna.»

Nus sperein che el, che ha ina veta ora encuretg la verdad senza nin risguard persunal, hagi era anflau ella e cun ella il ruaus perpeten. RIP